

## Ny Valosoa sy hadihady

# Miseho hatrany ireo sokajin'olona tsy mahatanty ny zavatra atao aminy

Mihazakazaka miaro ny tenany ny olom-pirenena amin'izao fotoana izao, manoloana ny fihanaky ny valanaretina covid-19 andiany faharoa, izay mahery vaika, sy ny fihetsiky ny fitondrana amin'ny fandraisana fepetra. Mipoitra ihany koa mirazotra amin'izany, ny fitakiana avy amin'ny sokajin'olona maro samihafa, fa mahatsiaro ho adino miohatra amin'ny hafa. Manao tohivakana etsy ankilan'izay ny olan'ny mpanjifa rakotry ny daroky ny adim-piainana, noho ny sondrobidim-piainana nandritry ny fotoana ela. Zary mifamatotra izany rehetra izany, ka miteraka kihon-dalana iray lehibe eo amin'ny fiainam-pirenena.

### Tsy tongatonga ho azy ny zava-misy

Ny taranaka ankehitriny no anisan'ny ory sy miharitra fahoriana indrindra, raha oharina amin'ny fiainan'ny Malagasy hatramin'izay niorenan'ny fanjakana Malagasy izay. Tsy misy tsy hita amin'ny fiainany andavanandro amin'izao ny olana isan-karazany, izay tsy nosainina velively ny hisiany taona maro tany aloha. Vao mainka koa niharihary izany ao anatin'izao krizy mafy ara-pahasalamana izao. Tsy tongatonga ho azy sy efa lahatra anefa izao manjo azy izao. Saika ny maro no miara-miaiky fa natao mihitsy ny hahatonga azy ho amin'izao toeran'ny firenena izao. Ny fositra iray lehibe dia ny nataon'ny avy any ivelany. Tsy misaraka ihany koa anefa io, amin'ny faneken'ny avy ato anatin'ny vahiny na indrindra teratany Malagasy, ny hanaiky ho fitaovana noho ny fahitany tombontsoa ao anatin'izany. Ireto farany no manao izay hahamontsana ny maha izy azy ny firenena amin'ny lafiny samihafa. Mazava loatra fa ireo olona ireo dia tsara toerana eo anivon'ny firenena, na any amin'ny fitondrana na misandrahaka amin'ireo sampan-draharaha sy toerana stratejika iankilan'ny aim-pirenena. Tsy manafaka an'i Madagasikara hahazo fahaleovantena mangarahara ireo sokajin'olona ireo, fa manampy trotraka amin'ny geja mahazo azy.

### Voatery manaraka ny riaka mifehy

Zary mitady izay hahasoa ny tenany sy ahavelomany ny sarambagem-bahoaka amin'izao fotoana izao. Na izany eo amin'ny fihariana ary indrindra eo amin'ny fitadiavana fanafody anoharana ity fahavalo tsy hita maso tsy miahotra mikendry ny hanàla ny ain-dehibe ity. Noho ny fahitana sy fahenoana ny zava-mitranga isan'andro, no manery azy hiroso amin'izany, fa tsy ny fepetra apetraky ny fitondrana loatra. Porofon'izany ny tsy fiarahana mitovy hevitra amin'izay ho fanapahan-kevitra ny fitondrana kanefa tsy maintsy manaiky aloha. Ireo mpitondra koa etsy ankilany, mihevitra izay hitsiny izay hita ho tsy mirazotra velively amin'ny fiheveram-bahoaka. Na mihevi-tena ho mahay aza izao fitondrana izao, heviny irery izay, dia

milefitra anoloan'ny fikorianana misy. Iray amin'izany ny "baiko" apetraky ny firenen-dehibe, ny mpamatsy vola iraisam-pirenena, ary ireo rafitra iraisam-pirenena izay "iankohofan'ny" fitondrana ankehitriny, mba hahazoana famatsiam-bola. Nihambo ho hahavitana hiàla amin'ireo i Andry Rajoelina tany am-pian-dohana kanefa iarahamahita ny zava-misy amin'ny mba hahazoana vola amin'ireo tato ho ato. Raha fehezina, ny vahoaka tsy maintsy manaraka ny zotram-piainana tsy araka ny faniriany; ny fitondrana ziogain'ny tsindry maro samihafa, ka mahatonga azy hitondra ny firenena ho amin'izao lalana izao. Tsy nifanarahana tamin'ny vahoaka anefa izany.

### Hitombo hatraiza ny tsy mahazaka

N'inona n'inona ambara, ny vahoaka no tompom-pahafana sy tompon'ity firenena ity. Ny ngidim-piainana atrehina andro aman'alina ho zakany hatramin'ny oviana? Efa miseho hatrany izao ireo sokajin'olona tsy mahazaka ny atao aminy. Anisan'ny iray misongadina amin'izany ny fitakian'ireo mpitsabo mpanampy "paramedy", izay tsy mbola nivaly hatramin'izao fa narirarira. Mazava loatra, fa na anaovana vavabe sy fanaratsiana aza izy ireo, dia mbola hitaky ny zony tsy azony tamin'ny taon-dasa. Etsy ankilan'izany, mahavariana fa efa am-bolana maro izao no nitaky ny karamany ireo mpiasa amin'ny orinasa Kraoma, ny inspekteran'ny asa, ny eny anivon'ny Croua amin'ny anjerimanontolo, sns... fa toa manao antso an-tany efitra. Rehefa ho goavana ve ny fahavoazana, toy ny zava-misy iarahamahita ankehitriny vao hikoropaka. Tsy mahagaga aloha izay, fa mety hitranga satria izao fitondra Rajoelina izao, dia tsy miraika raha tsy efa omby loha ny rovitra, fa raha omby tondro tsy miraika sy tsy mivaky loha. Hampanahy ny ho avy.

### Laharam-pahamehana samihafa

Zava-maro loha mifamatotra ireo, ary tsy mahita ny lalana hamahana azy ny fitondrana hatreto. Vahoolana vonjimaika lava no hitan'ny maro misy. Ny ataony ihany koa, dia ny fanarian-dia amin'ny asa hafa tsy mahamaika ny vahoaka. Tsotra sy mazava ny mahamaika ny vahoaka, ary izay no tokony hihazakazahan'ny fitondrana sy hifantohany amin'ny asa ataony raha ananany ny fahendrena amin'ny fahaiza-mitondra firenena, fa tsy ny azy miharo kajikajy amin'ny fiarovantseza sy tombontsoa manokana. Tsy hisy fanarenam-pirenena mazava sy fampandrosoana marina eto amin'ity firenena ity raha hifanipaka, na tsy ho mirazotra na hikambana mihitsy ny laharam-pahamehana eo amin'ny vahoka sy ny fitondrana. Hija-nona hatrany ho farany amin'ny firenena maneran-tany, sy ho mena-mitaha amin'ny hafa isika raha ho toy izany no fiainana eto.

Sôh'son

## VAKSINY COVID-19

# Mbola tsy fantatra rahoviana no ho tonga ny anjara dôzintsika

Mampiova ny paikady erantany ankehitriny ny valanaretina Covid-19 "variant sud-africain" na B1351, izay mahery vaika na dia miadana kokoa ny fiparitahany, noho ilay karazany voalohany SARS-CoV-2. Olona 44 no voamarina fa mitondra ny soritaretina mifandraika amin'ny B1351 ao Londres, renivohitr'i Angletera, izay nahitana fanalefahana ireo fepetra mikasika ny fihobhana. Mampametra-panontanianana izany eo anatrehan'ireo rehetra efa vita vaksiny. Mahatohitra ny B1351 ve izy ireo satria ho an'ny ankamaroany dia vaksiny Oxford-AstraZeneca no nanindronana azy? Raha eo anivon'ireo vaksiny nomen'ny OMS alalana, voalaza fa ny Pfizer-BioNTech, no vaksiny mandaitra indrindra entina miady amin'ny B1351. Manaraka an'io dia ny Moderna sy ny Johnson & Johnson, izay voalaza fa lefifely kokoa ny heriny eo anatrehan'ny B1351. Ny Oxford-AstraZeneca sy ny Sputnik V indray dia voafaritra hatreto fa tsy ampy hoentina miady amin'ny B1351.

Anatin'ny praograma Covax, izay misy ny famatsiana manokana an'ireo firenena mahantra dia efa nahazo vaksiny AstraZeneca 600.000 hetsy i Ghana ary 504.000 i Côte d'Ivoire. Hanao ahoana koa izany ny fiatrehana ny B1351, raha sanatria tafiditra ao Ghana na Côte d'Ivoire ity valanaretina ity?

Tsy mipetraka aloha eto ny fanontanianana ho an'i Madagasikara, satria variana mitavoza voa ny fitondrana amin'ity resaka vaksiny ity, mbola tsy fantatra, rahoviana no ho tonga ny anjara vaksintsika. Ao anatin'izany ny filoha mbola mahavita miala sasatra no sady mandainga ihany hoe ampy ny fanafody.

Ny Valosoa



## TOMONTAKALO

# Ahirato re ny maso

Mba mahaiza re mijery f'efa efatra ny maso !  
Aok' izay ny fitapitaka ary koa ny andrasoandraso.  
Tsy fotoana fampiesonana ireo vahoaka intsony izao,  
Fa tena zavatra mivaingana , izay no andrasana aminao.

Ianao no nampibaby trosa be indrindra ny vahoaka,  
Raha atao ny kajikajy izay misarin' ampamoaka.  
Tsisy nahavita izany ireo mpitondra nifanolo.  
Telo taona ianao no teo dia 'ndreo fa resinao daholo !

Indro izao ilay Gasikara misongadina amin'ny lisitra,  
Fa voatanany ny lohany amin'ireo miady gisitra !  
Ny rehetra izay mitazana , tapitra efa miaiky antsika,  
Hoe ilay firenena kely boka-trosa eto Afrika !

Koa sokafy re ny maso f'efa ikoizan'ny rehetra !  
Atsaharo ny bontolo sy fanaovana amboetra.  
Fa raha `zao no mbola hitohy dia mbola ho avy ny fotoana  
Handrombahanao ny amboaran'ny MPANDANILANY FOANA !

IRINA HO TAFITA (15-04-21)

## PRIERE AU SACRE CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue.  
Remerciements au Sacré Cœur pour faveurs obtenues.

Fy Avo R.

## Vehivavy TIM

# Hitondra fanampiana ho an'ireo gadra politika indray ny talata ho avy izao

Ny talata 20 aprily 2021 izao no fotoana hanangonan'ny vehivavy Tiako i Madagasikara (TIM) indray, izay voatsiramin'ny tanana, ho fanampiana ireo gadra politika mbola tavela any amponja ankehitriny, araka ny fivoriana nataon'ny biraon'ny vehivavy TIM eto Analamanga omaly. Ireo gadra politika 9 mianadahy no voakasi-izao fanampian'izy ireo izao indray, miampy an'i Berija. Ny vehivavy TIM dia maneho fisaorana sahady ireo izay efa nanolotanana rehetra, sy ireo izay nampanantena fa handray anjara mavitrika amin'izany hanampiana ireo voafonja tsy ara-dra-riny ireo. Ny talata ihany



Ny sasany amin'ireo gadra politika miisa 9 mianadahy.

dia ho zaraina amin'ny fianakavian'ireto voafonja noho ny resaka politika

ireto ny vola voahangona rehetra . Raha misy ny fangatahana fanazavana

dia afaka miantso ny telefôna 0347907600.

Helisoa